

24. november

Apeqquteqaat aallaavigalugu Kalaallit Nunaat suli minguinnerusooq Inatsisartuni oqallisissiatut siunnersuutigineqarpoq.

(Inatsisartunut ilaasortaq Anders Olsen, Siumut)

Nunatta suli minguinnerusooq anguniarneqarnissaanut oqallinnissamut siunnersuuteqarneq nalaatsornerinnaanngittoq oqaatigisariaqarpoq, nukissiuuteqarnikkummi 1990-sikkut sioqqullugit ikummatissamik atuinerput nunarput tamaat ataatsimut isigissangaanni annertoorujussuusoq ilisimalluinnaratsigu.

Erngup nukinganik nunatsinni nukissiuuteqalernissaanik siunertaqarlutik aallarniisimasut miki-nngitsumik qutsavissaraagut, tassami nunatta tunniussinnaasaasa ilaminiinnannguaaraat nukissiornermut atuligarput, eqqaamasassattali ilagisariaqarpaat iluaqutissartaa akileeqataasunut tamanut atuutsinneqartariaqarmat, taamaammat sarfap akiata assigiikkunnaarsimanera aamma eqqarsaatigeqqitassatta ilagisariaqarpaat.

Siunissaq ungasinnerusooq eqqarsaatigalugu aningaasaliisarneq nunatsinni ataqqinaatigaarput, kinguaassattami oqinnerusumik atugaqarnissaannut aqquatsissiuussineruvoq pingaarutilerujussuaq.

Taamaattumik pissusissamisussuooq ikummatissamik atuisuunngitsumik nunatta sinnerani atuilernissamik misissuisoqassappat, ukiunilu makkunani periarfissat saqqummerartuurtut atorluarlugit sarfap atukkatta akiata suli appasinnerulernissaanut aqquatsissamik misissuinissaq Siumumiik suleqataaffigissagatsigu oqaatigissuarput.

Naggataatigut oqaatigissuarput Inatsisartunut ilaasortaq Anders Olsen-ip Inatsisartut oqaaseqaatisaattut siunnersuutaa Siumumit tamakkiisumik taperseratsigu.

Nikolaj Jeremiassen

Siumut

